

॥ तैत्तिरीय संहिता ॥

॥ प्रथमः प्रश्नः ॥

॥ तैत्तिरीयसंहितायां प्रथमकाण्डे प्रथमः प्रश्नः ॥

इ॒षे त्वो॒र्जे त्वा॑ वा॒यवः॑ स्थोपा॒यवः॑ स्थ दे॒वो वः॑
सवि॒ता प्रा॑र्पयतु श्रेष्ठ॑तमाय॒ कर्म॑ण॒ आ प्या॑यध्वम॒घ्निया॑
देवभा॒गमूर्ज॑स्वतीः पय॑स्वतीः प्र॒जाव॑तीरनमी॒वा अ॑य॒क्ष्मा मा
वः स्तेन॑ ई॒शत॒ माऽघ॑श॒सो रु॒द्रस्य॑ हे॒तिः परि॑ वो वृणक्तु
ध्रु॒वा अ॒स्मिन्गोप॑तौ स्यात ब॒ह्वीर्य॑ज॒मान॑स्य प॒शून्पा॑हि॥१॥

इ॒षे त्रिच॑त्वारि॒शत॑। (1)॥ ————— [१]

य॒ज्ञस्य॑ घोष॑द॒सि प्र॒त्युष्ट॑र॒क्षः प्र॒त्युष्टा॑ अ॒रा॒तयः॑
प्रेय॑म॒गाद्धि॑षणा॒ ब॒र्हिर॑च्छ॒ मनु॑ना कृ॒ता स्व॒धया॑ वि॒त॑ष्टा
त आ॑व॒हन्ति॑ क॒वयः॑ पु॒रस्ता॑द्दे॒वेभ्यो॑ जुष्ट॑मि॒ह ब॒र्हिरा॑सदे
दे॒वानां॑ परि॑षू॒तम॑सि व॒र्षवृ॑द्धम॒सि दे॒व॑ब॒र्हिर्मा त्वा॑ऽन्व॒ङ्गा
ति॒र्यक्प॑र्व॒ ते रा॒ध्यास॑माच्छे॒त्ता ते मा रि॑षं दे॒व॑ब॒र्हिः
श॒तव॑ल्शं वि॒ रौह॑ स॒हस्र॑वल्श॥२॥

वि व॒यं रु॑हेम पृथि॒व्याः स॒म्पृचः॑ पा॒हि सु॒स॒म्भृतां॑ त्वा

सम्भ॑राम्यदि॒त्यै रा॒स्त्रां ऽसीन्द्रा॑ण्यै स॒न्नह॑नं पू॒षा ते॑ ग्र॒न्थिं ग्र॑न्थातु
स ते॒ मा ऽऽस्था॑दिन्द्र॒स्य त्वा बा॒हुभ्या॑मुद्य॒च्छे बृ॒हस्प॑ते॒र्मूर्धा
ह॑राम्यु॒र्वन्तरि॑क्षमन्वि॒हि दे॒वङ्ग॑मम॑सि ॥ ३ ॥

सहस्र॑वल्शा अ॒ष्टात्रिं॑शच्च। (2) ॥ [२]

शु॒भ्रध्वं॑ दै॒व्याय॑ कर्म॒णे दे॒वय॑ज्यायै मा॒तरि॑श्व॒नो घ॒र्मो ऽसि॑
द्यौर॑सि पृ॒थिव्या॑सि वि॒श्वधा॑या अ॒सि पर॑मे॒ण धाम्ना॑ दृ॒ह॑स्व
मा ह्वा॒र्वसू॑नां प॒वित्र॑मसि श॒तधा॑रं वसू॑नां प॒वित्र॑मसि
स॒हस्र॑धारं हु॒तः स्तो॒को हु॒तो द्र॒प्सो ऽग्न॑ये बृ॒हते॑ नाका॒य
स्वाहा॑ द्यावा॑पृ॒थिवी॑भ्यां सा वि॒श्वायुः॑ सा वि॒श्वव्य॑चाः
सा वि॒श्वक॑र्मा स॒म्पृच्य॑ध्वमृ॒तावरी॑रू॒र्मिणी॑र्मधु॒मत्त॑मा म॒न्द्रा
धन॑स्य सा॒तये॑ सोमे॒न त्वा ऽऽत॑न॒च्मीन्द्रा॑य दधि॒ विष्णो॑
ह॒व्यं र॑क्षस्व ॥ ४ ॥

सोमे॑नाष्टौ च। (3) ॥ [३]

कर्म॒णे वां दे॒वेभ्यः॑ श॒केयं॑ वे॒षाय॑ त्वा प्र॒त्युष्ट॑ रक्षः प्र॒त्युष्टा॑
अ॒रा॑तयो धू॒रसि॑ धूर्व॒ धूर्व॑न्तं धूर्व॒ तं यो॑ ऽस्मान्धूर्व॑ति तं धूर्व॒
यं व॒यं धूर्वा॑म॒स्त्वं दे॒वाना॑मसि॒ सस्त्रि॑तमं प॒प्रि॑तमं जुष्ट॑तमं

वह्नि॑तमं दे॒व॒हूत॑म॒मुह॑तमसि ह॒वि॒र्धानं॑ दृ॒हंस्व॑ मा ह्वा॑र्मि॒त्रस्य॑
त्वा चक्षु॑षा॒ प्रेक्षे॑ मा भेर्मा॑ सं वि॒क्था॒ मा त्वा॑॥५॥

हि॑सिष॒मुरु॑ वाता॑य दे॒वस्य॑ त्वा सवि॒तुः प्र॑स॒वे-
ऽश्वि॑नो॒र्बा॒हुभ्यां॑ पू॒ष्णो ह॑स्ता॒भ्याम॑ग्नये जुष्टं॑ निर्व॒पाम्य॑ग्नी-
षोमा॑भ्यामिदं दे॒वाना॑मिदमु॑ नः स॒ह स्फा॑त्यै त्वा
नारा॑त्यै सुव॑र॒भि वि॑ ख्ये॒षं वैश्वान॑रं ज्योति॑र्द्दृ॒हंन्ता॑न्दुर्या
द्यावा॑पृथि॒व्यो रु॒र्वन्तरि॑क्ष॒मन्वि॒ह्यदि॑त्यास्त्वो॒पस्थे॑ सादया॒म्यग्ने॑
हव्य॑ र॒क्षस्व॑॥६॥

मा त्वा षट्त्वारि॑ंशच्च। (4)॥ [४]

दे॒वो वः॑ सवि॒तोत्पु॑ना॒त्वच्छि॑द्रेण प॒वित्रे॑ण वसोः॑ सूर्य॑स्य
र॒श्मिभि॑रापो॑ दे॒वीर॑ग्रेपुवो अ॒ग्रेगु॑वोऽग्रे॑ इ॒मं य॒ज्ञं न॑य॒ताग्रे॑
य॒ज्ञप॑तिं धत्त यु॒ष्मानिन्द्रो॑ऽवृणीत वृ॒त्रतू॑र्ये यू॒यमिन्द्र॑मवृणीध्वं
वृ॒त्रतू॑र्ये प्रोक्षि॑ताः स्था॒ग्नये॑ वो जुष्टं॑ प्रोक्षा॑म्य॒ग्नीषोमा॑भ्या॒ः
शुन्ध॑ध्वं दै॒व्याय॑ कर्म॑णे दे॒वय॑ज्याया॒ अव॑धूत॒ रक्षो॑ऽव॑धूता॒
अरा॑त॒योऽदि॑त्या॒स्त्वग॑सि॒ प्रति॑ त्वा॥७॥

पृथि॒वी वै॑त्त्वधि॒षव॑णमसि वानस्प॒त्यं प्रति॑ त्वा-

ऽदित्या॒स्त्वग्वे॑त्त्व॒ग्नेस्त॒नूर॑सि वा॒चो वि॒सर्ज॑नं दे॒ववी॑तये त्वा
 गृ॒ह्णाम्य॒द्रि॒रसि॑ वानस्प॒त्यः स इ॒दं दे॒वेभ्यो॑ ह॒व्य९ सु॒शमि॑
 शमि॒ष्वेष॑मा व॒दोर्ज॑मा व॒द द्यु॒मद्व॑दत व॒य९ सं॑घा॒तं जे॑ष्म
 व॒रुष॑वृद्धमसि॒ प्रति॑ त्वा व॒रुष॑वृद्धं वे॒त्तु परा॑पू॒त९ रक्षः॑
 परा॑पू॒ता अ॒रा॑तयो॒ रक्ष॑सां भा॒गोऽसि॑ वा॒युर्वो॑ वि॒वि॒नक्तु॑ दे॒वो
 वः॑ सवि॒ता हि॒र॑ण्यपाणिः॒ प्रति॑ गृ॒ह्णातु॥८॥

त्वा भाग एकादश च। (5)॥ [५]

अव॑धू॒त९ रक्षोऽव॑धू॒ता अ॒रा॑तयोऽदित्या॒स्त्वग॑सि॒ प्रति॑ त्वा
 पृथि॒वी वे॑त्तु दि॒वः स्क॑म्भ॒नि॒र॑सि॒ प्रति॑ त्वाऽदित्या॒स्त्वग्वे॑त्तु
 धि॒षणा॑ऽसि पर्व॒त्या प्रति॑ त्वा दि॒वः स्क॑म्भ॒नि॒र्वे॑त्तु धि॒षणा॑-
 ऽसि पा॒र्व॒ते॒यी प्रति॑ त्वा पर्व॒ति॒र्वे॑त्तु दे॒वस्य॑ त्वा सवि॒तुः
 प्र॑स॒वेऽश्वि॑नो॒र्बा॒हुभ्यां॑ पू॒ष्णो ह॑स्ता॒भ्याम॑धि॒व॒पामि॑ धा॒न्यम॑सि
 धि॒नु॒हि दे॒वान्प्रा॑णाय॒ त्वाऽपा॑नाय॒ त्वा व्या॑नाय॒ त्वा दी॒र्घा॑मनु
 प्र॑सि॒ति॒मायु॑षे धां दे॒वो वः॑ सवि॒ता हि॒र॑ण्यपाणिः॒ प्रति॑
 गृ॒ह्णातु॥९॥

प्राणाय त्वा पञ्चदश च। (6)॥ [६]

धृ॒ष्टि॑रसि॒ ब्रह्म॑ य॒च्छापा॑ऽग्नेऽग्नि॒मा॒माद॑ जहि निष्क्र॒व्याद॑९

से॒धा दे॒वय॑जं॒ वह॒ निर्द॑ग्धं॒ रक्षो॑ निर्द॑ग्धा॒ अरा॑तयो ध्रु॒वम॑सि
 पृथि॒वीं दृ॒हाऽऽयु॑र्दृ॒ह प्र॒जां दृ॒ह स॒जा॒ता॒न॒स्मै य॑ज॒मा॒नाय॒
 पर्यू॑ह ध॒त्रम॑स्य॒न्तरि॑क्षं दृ॒ह प्रा॒णं दृ॒हापा॑नं दृ॒ह स॒जा॒ता॒
 न॒स्मै य॑ज॒मा॒नाय॒ पर्यू॑ह ध॒रुण॑मसि॒ दिवं दृ॒ह चक्षु॑र॥१०॥

दृ॒ह श्रो॑त्रं दृ॒ह स॒जा॒ता॒न॒स्मै य॑ज॒मा॒नाय॒ पर्यू॑ह
 धर्मा॑ऽसि॒ दिशो॑ दृ॒ह योनि॑ दृ॒ह प्र॒जां दृ॒ह
 स॒जा॒ता॒न॒स्मै य॑ज॒मा॒नाय॒ पर्यू॑ह चि॒तः स्थ॑ प्र॒जाम॑स्मै
 र॒यिम॑स्मै स॒जा॒ता॒न॒स्मै य॑ज॒मा॒नाय॒ पर्यू॑ह भृ॒गूणा॑मङ्गि॒रसा॑
 तप॑सा तप्य॒ध्वं या॒नि घ॒र्मे क॒पाला॑न्युपचि॒न्वन्ति॑ वे॒धसः॑।
 पू॒ष्णस्ता॑न्यपि॒ व्र॒त इ॒न्द्रवा॑यू वि मु॒ञ्चता॑म्॥११॥

चक्षु॑रष्टाच॑त्वारि॒शच्च॑। (7)॥ ————— [७]

सं व॑पामि॒ समा॑पो अ॒द्भिर॑ग॒मत॒ समो॑ष॒धयो॒ रसे॑न॒
 स॒ रे॒वती॒र्जग॑तीभि॒र्मधु॑मती॒र्मधु॑मतीभिः सृ॒ज्यध्व॑म॒द्भ्यः परि॑
 प्र॒जा॑ताः स्थ॒ सम॑द्भिः पृ॒च्यध्वं॒ जन॑यत्यै त्वा॒ सं यौ॑म्य॒ग्रये॑
 त्वाऽग्री॑षोमा॒भ्याम्मुख॑स्य॒ शिरो॑ऽसि॒ घर्मो॑ऽसि वि॒श्वायु॑रुरु॒
 प्र॑थस्वो॒रु ते॑ य॒ज्ञप॑तिः प्रथ॒तां त्वच॑ गृ॒हीष्वा॒ऽन्तरि॑त॒

रक्षोऽन्तरिता अरातयो देवस्त्वां सविता श्रपयतु वर्षिष्ठे
 अधि नाकेऽग्निस्ते तनुवं माऽति धागग्ने हव्यं रक्षस्व
 सं ब्रह्मणा पृच्यस्वैकताय स्वाहा द्विताय स्वाहा त्रिताय
 स्वाहा ॥१२॥

सविता द्वाविंशतिश्च। (8) ॥ [८]

आदद इन्द्रस्य बाहुरसि दक्षिणः सहस्रभृष्टिः शततेजा
 वायुरसि तिग्मतेजाः पृथिवि देवयजन्योषध्यास्ते मूलं मा
 हिंसिषमपहतोऽरुः पृथिव्यै व्रजं गच्छ गोस्थानं वर्षतु
 ते द्यौर्बधान देव सवितः परमस्यां परावति शतेन पाशैर्यो-
 ऽस्मान्द्वेष्टि यश्च वयं द्विष्मस्तमतो मा मौगपहतोऽरुः
 पृथिव्यै देवयजन्यै व्रजं ॥१३॥

गच्छ गोस्थानं वर्षतु ते द्यौर्बधान देव सवितः परमस्यां
 परावति शतेन पाशैर्योऽस्मान्द्वेष्टि यश्च वयं द्विष्मस्तमतो मा
 मौगपहतोऽरुः पृथिव्या अदेवयजनो व्रजं गच्छ गोस्थानं
 वर्षतु ते द्यौर्बधान देव सवितः परमस्यां परावति शतेन
 पाशैर्योऽस्मान्द्वेष्टि यं च वयं द्विष्मस्तमतो मा ॥१४॥

मौगरुस्ते दिवं मा स्कान् वसवस्त्वा परिगृह्णन्तु

गाय॒त्रेण॒ छन्द॑सा रु॒द्रास्त्वा॒ परि॑गृह्णन्तु त्रैष्टु॑भेन॒ छन्द॑साऽ-
 ऽदि॒त्यास्त्वा॒ परि॑गृह्णन्तु जाग॑तेन॒ छन्द॑सा दे॒वस्य॑ सवि॒तुः
 स॒वे कर्म॑ कृण्वन्ति वे॒धसं॑ ऋ॒तम॑स्यृत॒सदन॑मस्यृत॒श्रीर॑सि
 धा अ॑सि स्व॒धा अ॑स्युर्वी चासि॒ वस्वीं॑ चासि पुरा क्रूर॑स्य
 वि॒सृपो॑ विर॒प्शिन्नु॒दादाय॑ पृथि॒वीं जी॒रदा॑नुर्यामैर॑यं च॒न्द्रम॑सि
 स्व॒धाभि॒स्तान्धीरा॑सो अनु॒दृश्य॑ यजन्ते॥१५॥

दे॒वय॑जन्तै ब्र॒जन्त॑मतो मा वि॒रप्शि॒न्नेका॑दश चा (9)॥—————[९]

प्रत्यु॑ष्टः रक्षः प्रत्यु॑ष्टा अरा॑तयोऽग्ने॑र्वस्तेजि॑ष्ठेन॒ तेज॑सा
 निष्ट॑पामि गो॒ष्ठं मा निर्मृ॑क्षं वा॒जिनं॑ त्वा सप॑त्नसा॒हः
 सम्मा॑र्जिर्मा वाचं॑ प्रा॒णं चक्षुः॑ श्रोत्रं॑ प्र॒जां योनिं॑ मा निर्मृ॑क्षं
 वा॒जिनी॑न्त्वा सप॑त्नसा॒हीः सम्मा॑र्ज्याशा॒साना॑ सौम॒नसं॑
 प्र॒जाः सौभा॑ग्यन्त॒नूम्। अ॒ग्नेरनु॑व्रता भू॒त्वा सन्न॑ह्ये सुकृ॒ताय॑
 कम्। सुप्र॑जसंस्त्वा व॒यः सु॒पत्नी॑रुप॥१६॥

सेदि॑म। अग्ने॑ सप॑त्नद॒म्भ॑न॒मद॑ब्धासो अदा॑भ्यम्। इ॒मं
 वि॒ष्यामि॑ वरु॑णस्य॒ पाशं॑ यम॑ब॒धीत॑ सवि॒ता सु॒शेवः॑। धा॒तुश्च॒
 योनौ॑ सुकृ॒तस्य॑ लो॒के स्यो॑नं मे स॒ह प॒त्या करो॑मि।
 समा॑युषा॒ सम्प्र॑जया॒ सम॑ग्ने वर्च॑सा पुनः॑। सम्प॑त्नी प॒त्याऽहं॑

गच्छे॒ समा॒त्मा त॒नुवा॒ मम॑। म॒हीना॒म्पयो॒ऽस्योष॑धीना॒५
रस॒स्तस्य॒ तेऽक्षी॑यमाणस्य॒ निर॑॥१७॥

व॑पा॒मि म॒हीनां॑ प॒योऽस्योष॑धीना॒५ रसो॑ऽद॒ब्धेन॒ त्वा
चक्षु॑षाऽवै॒क्षे सु॒प्रजा॒स्त्वाय॒ तेजो॑ऽसि॒ तेजो॑ऽनु॒ प्रेह्य॒ग्निस्ते॒
तेजो॑ मा वि नै॒दग्ने॑र्जि॒ह्वाऽसि॑ सु॒भूर्दे॒वानां॑ धा॒म्रेधा॒म्रे दे॒वेभ्यो॑
यजु॑षेयजुषे भव शु॒क्रम॑सि॒ ज्योति॑रसि॒ तेजो॑ऽसि दे॒वो वः
सवि॒तोत्पु॑ना॒त्वच्छि॑द्रेण॒ पुवि॑त्रेण॒ वसोः॑ सूर्य॑स्य र॒श्मिभिः॑
शु॒क्रं त्वा॑ शु॒क्रायां॑ धा॒म्रेधा॒म्रे दे॒वेभ्यो॑ यजु॑षेयजुषे गृ॒ह्णामि॑
ज्योति॑स्त्वा॒ ज्योति॑ष्य॒र्चिस्त्वा॒ऽर्चिषि॑ धा॒म्रेधा॒म्रे दे॒वेभ्यो॑
यजु॑षेयजुषे गृ॒ह्णामि॑॥१८॥

उप॒ नी र॒श्मिभिः॑ शु॒क्र५ षोड॑श च। (10)॥—————[१०]

कृ॒ष्णो॑ऽस्याखरे॒ष्ठोऽग्नये॑ त्वा॒ स्वाहा॒ वेदि॑रसि ब॒र्हिषे॑ त्वा॒
स्वाहा॑ ब॒र्हिर॑सि सु॒ग्न्यस्त्वा॒ स्वाहा॑ दि॒वे त्वा॒ऽन्तरि॑क्षाय त्वा॒
पृथि॑व्यै त्वा॑ स्व॒धा पि॒तृभ्य॒ ऊर्ग॑भव ब॒र्हिष॑द्भ्य॒ ऊर्जा॑ पृथि॒वीं
गच्छ॑त॒ विष्णोः॑ स्तू॒पोऽस्य॑ूर्णा॒म्रद॑सं त्वा स्तृ॒णामि॑ स्वास॒स्थं
दे॒वेभ्यो॑ गन्ध॒र्वोऽसि॑ वि॒श्वाव॑सुर्वि॒श्वस्मा॑दी॒षतो॑ यज॑मानस्य

परिधि॒रिड ई॒डित इन्द्र॑स्य बा॒हुर॑सि॒ ॥१९॥

दक्षि॑णो यज॑मानस्य परिधि॒रिड ई॒डितो मि॒त्रावरु॑णौ
त्वोत्तर॑तः परि॑धत्तां ध्रु॒वेण॒ धर्म॑णा यज॑मानस्य परिधि॒रिड
ई॒डितः सूर्य॑स्त्वा पु॒रस्ता॑त्पातु कस्या॑श्चिद॒भि॒श॑स्त्या
वी॒तिहो॑त्रं त्वा कवे द्यु॒मन्त॑ꣳ समि॑धीम॒ह्यग्रे॑ बृह॒न्तम॑ध्वरे
वि॒शो य॒न्त्रे स्थो॑ वसू॒नाꣳ रु॒द्राणा॑मादि॒त्यानाꣳ सद॑सि सीद
जुहू॑रुप॒भृद्भुवा॑ऽसि घृ॒ताची॑ नाम्ना॑ प्रि॒येण॒ नाम्ना॑ प्रि॒ये सद॑सि
सीदै॒ता अ॑सदन्थ्सुकृ॒तस्य॑ लो॒के ता वि॑ष्णो पाहि पा॒हि य॒ज्ञं
पा॒हि य॒ज्ञप॑तिं पा॒हि मां य॑ज्ञ॒निय॑म् ॥२०॥

बा॒हुर॑सि प्रि॒ये सद॑सि पञ्चद॑श च। (11) ॥ [११]

भुव॑नमसि॒ वि प्र॑थ॒स्वाग्रे॒ यष्टि॑रिद॒न्नमः॑। जुह्वे॒ह्यग्नि॑स्त्वा
ह्वय॑ति देवय॒ज्याया॒ उप॑भृदेहि॒ देव॑स्त्वा सवि॒ता ह्वय॑ति
देवय॒ज्याया॒ अग्ना॑विष्णू मा वा॒मव॑ क्रमिषं॒ वि जि॑हाथां
मा मा॒ सन्ता॑मल्लो॒कं मे॑ लोक॒कृतौ॑ कृणुतं॒ विष्णोः॒
स्थान॑मसी॒त इन्द्रो॑ अकृ॒णोद्वी॑र्याणि॒ समा॒रभ्यो॑र्ध्वो अ॒ध्वरो
दि॒वि॒स्पृश॑महु॒तो य॒ज्ञो य॒ज्ञप॑तेरिन्द्रा॒वान्थ॑स्वाहा॒ बृह॑द्वाः पा॒हि
मा॑ऽग्रे दुश्च॑रिता॒दा मा॒ सुच॑रिते भज म॒खस्य॒ शिरो॑ऽसि सं

ज्योतिषा ज्योतिरङ्गाम्॥२१॥

अहुत एकविंशतिश्च। (12)॥ [१२]

वाजस्य मा प्रसुवेनोद्गाभेणोदग्रभीत्। अथा सपत्ना५ इन्द्रो
मे निग्राभेणाधरा५ अकः। उद्गाभश्च निग्राभं च ब्रह्म देवा
अवीवृधन्। अथा सपत्नानिन्द्राग्री मे विषूचीनान्व्यस्यताम्।
वसुभ्यस्त्वा रुद्रेभ्यस्त्वाऽऽदित्येभ्यस्त्वाऽक्त५ रिहाणा
वियन्तु वयः। प्रजां योनिं मा निर्मृक्षमा प्यायन्तामाप
ओषधयो मरुताम्पृषतयः स्थ दिवं॥२२॥

गच्छ ततो नो वृष्टिमेरया। आयुष्पा अग्नेऽस्यायुर्मे पाहि
चक्षुष्पा अग्नेऽसि चक्षुर्मे पाहि ध्रुवाऽसि यम्परिधिम्पर्यधत्था
अग्ने देव पुणिभिर्वीयमाणः। तन्त एतमनु जोषम्भरामि नेदेष
त्वदपचेतयातै यज्ञस्य पाथ उप समित५ सः५स्त्रावभागाः
स्थेषा बृहन्तः प्रस्तरेष्ठा बर्हिषदश्च॥२३॥

देवा इमां वाचमभि विश्वे गृणन्त आसद्यास्मिन्बर्हिषि
मादयध्वमग्नेर्वामपन्नगृहस्य सदसि सादयामि सुम्नाय सुम्निनी
सुम्ने मा धत्तन्धुरि धुर्यो पातमग्नेऽदध्यायोऽशीततनो पाहि
माऽद्य दिवः पाहि प्रसित्यै पाहि दुरिष्ठ्यै पाहि दुरद्वन्यै

पा॒हि दु॒श्च॑रि॒ताद॑विष॒न्नः पि॒तुङ्क॑णु सु॒षदा॒ योनि॑ः॒ स्वाहा॒ देवां॑
गा॒तुवि॑दो गा॒तुं वि॒त्वा गा॒तुमि॑त॒ मन॑सस्प॒त इ॒मन्नो॑ दे॒व दे॒वेषु॑
य॒ज्ञः स्वाहा॑ वा॒चि स्वाहा॒ वाते॑ धाः॥२४॥

दिवंश्च वि॒त्वा गा॒तुन्न॑योदश च। (13)॥ [१३]

उ॒भा वा॑मिन्द्रा॒ग्नी आ॑हुव॒ध्या उ॒भा राध॑सः स॒ह मा॑द॒यध्वै॑।
उ॒भा दा॒तारा॑वि॒षाः र॑यी॒णामु॒भा वाज॑स्य सा॒तये॑ हुवे
वाम्। अश्र॑वः॒ हि भू॑रि॒दाव॑त्तरा वां वि जा॑मातुरु॒त वां घा॑
स्या॒लात्। अथा॒ सोम॑स्य॒ प्रय॑ती यु॒वभ्या॑मिन्द्रा॒ग्नी स्तोमं॑
जन॑यामि॒ नव्य॑म्। इन्द्रा॒ग्नी नव॑तिम्पु॒रो दा॑सप॒त्नीर॑धूनु॒तम्।
सा॒कमे॑के॒न क॑र्मणा। शुचि॒न्नु स्तोम॑न्नव॒जात॑म॒द्येन्द्रा॑ग्नी
वृ॒त्रह॑णा जु॒षेथा॑म्॥२५॥

उ॒भा हि वा॑ः सु॒हवा॒ जोह॑वीमि॒ ता वाज॑ः स॒द्य
उ॑श॒ते धे॑ष्ठा। व॒यमुं॑ त्वा पथस्प॒ते रथ॑न्न वाज॑सातये। धि॒ये
पू॑षन्नयु॒ज्महि॑। प॒थस्प॑थः परि॑पतिं वच॒स्या का॑मे॒न कृ॑तो
अ॒भ्या॑नडु॒र्कम्। स नो॑ रा॒सच्छु॑रुधंश्चन्द्रा॒ग्रा धि॑य॒न्धियः॑
सी॒षधा॑ति॒ प्र पू॒षा। क्षे॒त्रस्य॑ पति॑ना व॒यः हि॒तेनै॑व ज॒याम॑सि।
गा॒मश्व॑म्पोषयित्वा स नो॑॥२६॥

मृडातीदृशैः। क्षेत्रस्य पते मधुमन्तमूर्मिन्धेनुरिव पयो
 अस्मासु धुक्व। मधुश्चतङ्घृतमिव सुपूतमृतस्य नः पतयो
 मृडयन्तु। अग्ने नय सुपथा राये अस्मान् विश्वानि देव
 वयुनानि विद्वान्। युयोध्यस्मञ्जुहुराणमेनो भूर्यिष्ठान्ते नम
 उक्तिं विधेम। आ देवानामपि पन्थामगन्म यच्छुक्रवाम्
 तदनु प्रवोदुम्। अग्निर्विद्वान्त्स यजात्॥२७॥

सेदु होता सो अध्वरान्त्स ऋतून्कल्पयाति। यद्वा-
 हिष्ठन्तदग्नये बृहदर्च विभावसो। महिषीव त्वद्रयिस्त्वद्वाजा
 उदीरते। अग्ने त्वम्पारया नव्यो अस्मान्स्वस्तिभिरति
 दुर्गाणि विश्वा। पूश्च पृथ्वी बहुला न उर्वी भवा तोकाय
 तनयाय शय्योः। त्वमग्ने व्रतपा असि देव आ मर्त्येष्व।
 त्वं यज्ञेष्वीडः। यद्वो वयम्प्रमिनाम व्रतानि विदुषां देवा
 अविदुष्टरासः। अग्निष्टद्विध्वमा पृणाति विद्वान् येभिर्देवा
 ऋतुभिः कल्पयाति॥२८॥

जुषेथामा स नो यजादा त्रयोविंशतिश्च। (14)॥[१४] [इषे त्वा यज्ञस्य शुन्ध्वं
 कर्मणे देवोऽवधूतन्मृष्टिः सं वपांम्या ददे प्रत्युष्टं कृष्णोऽसि भुवनमसि वाजस्योभा वां
 चतुर्दश॥14॥ इषे द२ह भुवनमष्टाविंशतिः॥28॥ इषे त्वा कल्पयाति॥]

GitHub: <http://stotrasamhita.github.io> | <http://github.com/stotrasamhita>
Credits: <http://stotrasamhita.github.io/about/>